

Referencia para *Ni chigaca lu reunión* *Xhiiña' Dios ne modo nabánu*

6-12 DE MAYO

CA TESORO ZEEDA LU BIBLIA | 2 CORINTIOS 4-6

«Qué rire'nu gana»

w04-S 15/8 yaza 25 párr. 16, 17

Ridxáganu, peru qué riaananu sin stipa

¹⁶ Ni jma risaca nga, gápanu laanu en sentidu espiritual. Pa dxandí' xhamígunu Jiobá la? zanda guidxáganu en sentidu físicu, peru qué ziiuu dxi guidxáganu de guni adorarnu laabe. Rudiibe «poder tuuxa ni ma' bidxaga ne rudiibe stipa cani ma' birá stipa sti'» (Isaías 40:28, 29). Ne apóstol Pablo biiya' dxandí' ca diidxa' ri', ngue runi bicaa: «Nga runi, qué rire'nu gana. Neca ze' dxi zirá stipa sti' xcuérpunu la? ladxi-do'no ne xquendabiaaninu ziyápaca' stipa cada dxi» (2 Corintios 4:16, *TNM*).

¹⁷ Guidú'yanu xi riní' ca diidxa' «cada dxi». Ca diidxa' ri' cayabi cani laanu, naquiiñe' guni aproveharnu guirá' dxi ca cosa ni rudii Jiobá laanu. Ti misionera ni ma' napa cuarenta y tres iza de cayuni xhiiña' Jiobá, gudi'dí' lu stale guendana-gana ni bisidxaga ne gulee gana laa, peru neca zacá qué ñaanabe sin stipa. Laabe guni'be: «Napa' costumbre guiasa' tempranu para gune' orar Jiobá ne guunda' Stiidxabe ante guzulú' gune' xcaadxi cosa. Programa ri', huayacané ni naa gune' huantar dede yanna». Zacá ni, pa guni orarnu ne guni meditarnu lu ca cualidad galán ne ca promesa sti' Jiobá «cada dxi» la? nanna dxíchinu zudiibe laanu stipa ni zacané laanu.

it-1-S yaza 70

Aguante

Laaca nabé risaca nga cadí gusaana de guiní' íquenu esperanza ni nápanu: laani nga guibá-ninu sin qué chu' dxi gátinu ne sin pecadu. Neca guuti binni laanu, peru qué zanda gáxha-

cabe laanu esperanza ni nápanu (Ro 5:4, 5; 1Te 1:3; Apo 2:10). Guirá' ca yuuba' ni cayuni huantarnu yanna ri', qué zanda di' guchaaganu cani né ca ndaaya' ni zápanu ora gaca cumplir esperanza sicarú nápanu ri' (Ro 8:18-25). Pa qué gusaana de guiní' íquenu promesa de guibánu sin qué chu' gátinu, intiica yuuba' gápanu neca jma naná gácani, peru nánnanu ti ratu si ni ne cadí naro'ba' pe' ni (2Co 4:16-18). Pa siempre guiní' íquenu tobi zidi'dí' si ca prueba ni ridxaagalunu ne cadí gusaana de guiní' íquenu esperanza ni bidii Dios laanu la? zacané nga laanu para cadí chu' xhaatanu xizaa o guiní' íquenu gusaananu Jiobá Dios.

Guyúbinu ca perla ni ga'chi'

w12-S 1/2 yaza 28

«Gusiéchenu Jiobá»

David Splane nga ti hermanu ni naca parte de Grupu ni Zaniru', laabe nga bidiibe discursu ri', ni biree de lu Biblia (2 Corintios 4:7). ¿Xii nga tesoro ni cuzeetebe ri' ya? ¿Conocimiento la? ¿Guendanuuxpiaani' la? «Co', —laabe guni'be—. Tesoro ni bizeete' Pablo nga, dxiiña' nápanu de gusi'dinu binni ni dxandí'» (2 Corintios 4:1, 2, 5). Bisietenalá'dxi' hermanu Splane ca estudiante que xi pur bi'ni' estudiarca' gaayu' beeu: para guni preparar ni laacabe lu ti asignación especial, ti dxiiña' nabé risaca sti' Dios.

Hermanu bidii discursu que bisiene, ca «guisu de yu» que runi representar cani cuerpu sti' binni. De raqué bichaagabe ti guisu de yu né ti guisu de oro. Ti guisu de yu la? guirá' dxi riquiñecabe laa, cadí casi ti guisu de oro ni huaxié' riquiñecabe. Pa nigú'chaahuinu xiixa cosa nabé risaca ndaani' ti guisu de oro, cadí dxandí' bia'ca nusiácanu guisu que né ni nuu ndaani' ni la?. Pur nga, gudxi hermanu Splane ca estudiante que ca diidxa' ri': «Cadí guyúbitu guisácatu. Ca misioneru naquiiñe' gacaneca'

binni gusisácaca' Jiobá si. Naquiiñe' gácatu humilde casi ti guisu de yu».

w09 15/11 yaza 21 párr. 7

Cadi gusaananu de gannaxhiinu ca xpinni Cristu jma

Yanna laanu, ximodo zanda gannaxhiinu ca xpinni Cristu jma ya'. Gasti' naca nga chuulá'dxinu chu'nu gaxha de ca binni ni bia'ca laanu laaca' o ni napa ngueca costumbre ni nápanu o ni riuula'dxi' laaca ni riuulá'dxinu. Peru pa pur nga guixéleno de xcaadxi binni la? naquiiñe' gúninu stipa pur gápanu jma xhamígunu. Guní' ique: «Ñee ca xhamiguasiá' ruchecheeniá' diidxa' la? Ñee raca nagana para naa gune' invitar xcaadxi xpinni Cristu guneniá' laaca' xiixa casi chizayaniá' laaca' la? Ñee qué ridxiña' caní nacubi cadagulisaa ndaani' Yoo sti' Reinu, purti' rabe' gapa si dxi nga para gaca xhamígucabe naa la? Ñee rudieena'ya' guirá' ca binni ridagulisaa cásica nahuini' ne zaqueca ni huaniisi la?»

13-19 DE MAYO

CA TESORO ZEEDA LU BIBLIA | 2 CORINTIOS 7- 10

«Ministeriu de socorro»

w98-S 1/11 yaza 25 párr. 1

«Nadxii Dios ca binni ni rudii né guendana-yeche'»

Primé la? guní' Pablo modo gucané ca xpinni Cristu de Macedonia lu ti campaña de socorro nezalú ca xpinni Cristu de Corinto. Sicarí' bicaa Pablo de laacabe: «Neca huadi'di cabe ra nagana peru nayeche nuu cabe. Nga runi neca huaxié' napa cabe peru huadii cabe de idubi ladxidó'cabe para acané cabe stobi». Cadi guyuu di' tu bisietenala'dxi' ca xpinni Cristu de Macedonia de campaña ri', sínuque de ladxido'ca' biale gacaneca'. Ngue runi Pablo guní' «nabé ucuá cabe lú du udi' du lugar acané cabe ca xcaadxi hermanu». Rihuinni dxiichi' biidii ca xpinni Cristu de Macedonia de ni nápacá'

ne bidiica' ni de guidubi ladxido'ca' né stale guendanayeche', nécape' laaca huaxié' nápacá' (2 Corintios 8:2-4).

kr yaza 209 párr. 1

Racanenu ca xpinni Cristu

BIXUI'LÚ nuunu iza 46 despué de ca dxi sti' Jesús ne cadú'yanu modo naaze' dxiichi' ti gubiña guidxi Judea. Ca discípulo sti' Cristu ni nabeza rari' qué ganda di' sica' ni goca'. Xiñee ya'. Purti' ma' huaxié' guendaró nuu guidxi Judea ne guizá' caru cadoo xcaadxi biidxi' nuu raqué, nga runi, pa qué chu' tu gacané ca xpinni Cristu la? zatiziica'. Peru iza ri' huaxa zuuya' ca cristianu ni ruzuuba' diidxa' ximodo chigudii Jiobá ni caquiiñeca' ne qué huayuu dxi gu'ya' nin tobi de laacabe modo chigacané Jiobá laacabe biae ri'. Xi chigaca ya'.

kr yaza 209, 210 párr. 4-6

Racanenu ca xpinni Cristu

4 Lu guiropa carta bicaa Pablu ra nuu ca xpinni Cristu de Corinto, bizeete' xipe' nga dxiña' bisaanané Dios laaca'. Dxandí' gucuá carta que para ca ungidu, peru ca xpinni Cristu ni zeeda gaca casi «xcaadxi dendxu», laaca zanda gúnica' ni guní' Pablu (Juan 10:16). Chupa cosa nga bisiene apóstol que naquiiñe' gúninu purti' xpinni Cristu laanu. Primé la? «güi né [nu] binni stiidxa be», laani nga ni rúninu ora rucheche-nu diidxa' ne ora rusí'dinu binni de Dios (2 Cor. 5:18-20; 1 Tim. 2:3-6). Guiropa la? «acané [nu] xcaadxi hermanu» ora tiidica' lu xiixa guendanagana (2 Cor. 8:4). Ora bizeete' Pablu guiropa' dxiña' ni naquiiñe' guni ca xpinni Cristu la? biquiiñebe diidxa' griegu *diakonía*. Xiñee risaca ni bizé'tenu ri' ya'.

5 Ora biquiiñe' Pablu ti diidxa' griegu si para bizeete' guiropa' dxiña' runi ca cristianu la? bicaabe laaca' guiéneca' ti cosa nabé risaca: tobi de ca dxiña' sti' ti neza binni ridagulisaa nga gacané ca hermanu sti' ora tiidica' ra nagana. Maca bisiénebe «adxé adxé modo [r]uni nu

xhiña Señor, peru *tobi si* Señor nuu. Laca adxé adxé ni runi cada tobi de laanu, peru [ti] *Espíritu [...] si runi irá ni*» (1 Cor. 12:4-6, 11). Nga runi, guirá' dxiiña' runi ca neza binni ridagulisaa, na Pablu laaca riquiiñe' cani para «usisaca [nu]» Dios «de idubi ladxidó' [no]» (Rom. 12: 1, 6-8). Racá ridú'yanu xiñee nabé guyuula'dxi' apóstol que iquiiñe' tiempu sti' para gacané «ca xpinni Cristu» (Rom. 15:25, 26).

6 Guirá' ni rúninu para gacanenu ca hermanu ni cadí'di' ra nagana, nuu cani lade ca cosa ni naquiiñe' guni ti xpinni Cristu ne zeeda cani lu adoración ni rudi'nu Jobá. Peru, xiñee rúninu cani ya'. Purti' ruzú'banu «stiidxa Cristu», nga nga ni bisiene Pablu ca xpinni Cristu de Corinto ora bicaabe carta ra nuuca' (2 Cor. 9:13). Cumu racalá'dxicabe gúnicabe guirá' ni bisiidi' Cristu la? racanécabe ca hermanu stícabe. Ndi' nga ni bisiene Pablu: guirá' ca cosa galán ni rúninu pur ca hermanu stinu, rúninu cani purti' ma' bisihuinni Dios «enda nacha'hui sti» luguianu (2 Cor. 9:14; 1 Ped. 4:10). Yanna guidú'yanu xi guni' revista *La Atalaya 1 sti' junio iza 1976*, ora cuzeete' pabia' naquiiñe' gacanenu ca hermanu stinu ni cadí'di' ra nagana: «Cadi guiaanda' ndi' laanu: para Jobá Dios ne para Xiiñi' Jesucristu, nabé risaca gacanenu ca hermanu ni cadí'di' ra nagana». Zacá nga laani, cani rúninu ora racanenu xcaadxi nuu cani lu serviciu sagradu ni rudi'nu Dios (Rom. 12:1, 7; 2 Cor. 8:7; Heb. 13: 16).

kr yaza 196 párr. 10

Tu rudii bueltu para gaca xhiña' Reinu

10 Primé, riale de laanu gudi'nu purti' nadxiinu Jobá ne racalá'dxinu «guni nu ni riula'dxi be» (1 Juan 3:22). Guizá' ríche' Jobá ora ruuya' riale de ndaani' ladxidó' ca xpinni gudiica' ni ná-paca'. Guidú'yanu xi guni' apóstol Pablu de ca cristianu ni riula'dxi' guni zacá (**biinda' 2 Corintios 9:7**). Zacá nga laani, tuuxa ni nanna xi guirá' naquiiñe' guni ti xpinni Cristu la? riuula'dxi' gudii ne qué rudii purti' si cucaacabe laa

guni ni; sínuque «[r]udii bia' rului'la'dxi'». Ora gú'yabe caquiiñe' gaca xiixa, rini' íquebe ximodo gaca ni, peru cadí ngasi, sínuque laaca rudiibe ni caquiiñe' para laani. Binni casi laabe ri' nga cani rusieche' ladxidó' Jobá, «purti nadxii Dios ni rudii ni laa de idubi ladxidó'», o casi na sti Biblia: «Rudii Dios xquixe ca binni ni rudii né stale gana».

Guyúbinu ca perla ni ga'chi'

w16.01 yaza 12 párr. 2

Ñee rudi'nu xquixepe' Dios pur ni bi'ni' pur laanu la?

2 Nanna Pablu zaquiiñe' guendaguti sti' Jesús para gaca cumplir guirá' promesa ni ma' bi'ni' Dios para laanu (**biinda' 2 Corintios 1:20**). Nga runi, lade ca cosa sicarú ni bi'ni' Dios «pur laanu» ri', nuu sacrificiu bi'ni' Jesús, guirá' modo rusihuinni Dios nadxii laanu ne guirá' ca cosa galán rudii Dios laanu. Nabé sicarú regalu ri', dede qué ridxélanu diidxa' para guininu ximodo ni. Xi naquiiñe' gucaa regalu sicarú ri' laanu guni sentirnu ya'. Xi naquiiñe' gúninu yanna ra ma' zeeda dxiña dxi guietenalá'dxinu guendaguti sti' Cristu ya'. Iza ri' zaca ni miércoles 23 de marzo.

g99-S 8/7 yaza 20, 21

¿Ñee jneza nga gudxi'banu laca laanu la? o co'?

Lu Escrituras Griegas Cristianas, verbo *kau-kjá-o-mai* raca traducirni «gudxiiba' laca laa, chu' nayeche' pur xiixa ni bi'ni', o guni presumir laca laa», ne riquiiñeni de forma negativu ne positivu. Guidú'yanu ximodo guni' Pablo de laani, laabe bizeetebe zanda «chu'nu nayeche' purti' nápanu esperanza zosisaca Dios laanu» ne laaca guni'be: «Ni runi presumir la? guni presumir ca cosa ni ma' bi'ni' Jobá» (Romanos 5:2; 2 Corintios 10:17, *TNM*). Ndi' rini' naquiiñe' chu'nu orgulloso purti' Jobá nga Dios stinu ne ra chu'nu orgulloso la? zacaneni laanu chu'nu nayeche' pur labe ne modo nácabe.

20-26 DE MAYO

CA TESORO ZEEDA LU BIBLIA | 2 CORINTIOS 11- 13

«Bidaabi ti guichi lu beela ladi Pablo»

w08 15/6 yaza 3 párr. 3

Guzuhua'nu dxiichi' neca ma' huaxié' stipa nápanu

Apóstol Pablu, stobi de ca xpinni Cristu ni bibani dxiqué, gunábabe Jobá chonna biaje cuee yuuba' o guendanagana ni zeeda gaca casi ti guichi ni cayuniná laabe que. Qué gán-nanu xipe' nga yuuba' gúpabe, peru nabé bininani laabe casi runiná ti guichi. Zándaca bi-chiiñani laabe ne zándaca ma' qué ñúnibe ni na Jobá ne stale guendanayeche'. Peru Jobá bicabi laabe sicarí': «Naa nuua para acaniá líi, ne nga si caquiiñu'. Purti jma rihuinni enda nandxó' stinne ora cayaadxa stipa líi». Jobá qué nibee di' yuuba' sti' Pablu que, ne gúpabe xidé bidxiilube ni, laabe guni'be: «Nanna ora riaadxa stipa naa la? jma rusi racané Cristu naa» (2 Cor. 12:7-10). Ximodo zanda guiénenu ni guni'be ca ya'.

w07 1/1 yaza 17 párr. 17, 18

Jobá rudii espíritu santu caní rinaba' ni laa

¹⁷ Sicarí' bicabi Dios apóstol Pablu: «Naa nuua para acaniá líi, ne nga si caquiiñu'. Purti jma rihuinni enda nandxó' stinne ora cayaadxa stipa líi». Nga runi guni' Pablu: «Jma ríeche ora huaxié' stipa napa', purti óraque jma rusi rihuinni enda nandxó' sti Cristu luguia'ya» (2 Corintios 12:9; Salmo 147:5). Xi cusiidi' Pablu laanu ne ca diidxa' ri' ya'. Cusiidibe laanu bisihuinni Dios guendanandxó' sti' ora biquiiñe' Cristu para gupa laabe, casi ñaca niguu laabe ndaani' ti yoo de lari. Yanna ri' laaca zacagá ricabi Jobá ca oración stinu, purti' rápabe laanu casi ora niguube laanu ndaani' yoo de lari.

¹⁸ Ti yoo la? qué rucueeza di' de guiaba nisa-guie' o de gundubi bi, peru rulani laanu. Zacaca nga yanna ri', cadí purti' si cayapa «enda nan-

dxó' sti Cristu» laanu la? ma' qué zápanu guendanagana. Peru racaneni laanu gudxí'lu-nu guirá' guendaquéiquiñe' ni nuu yanna ne caní culaa Binidxaba' luguianu ti cadí guixéle-nu de Dios (Apocalipsis 7:9, 15, 16). Nga runi, pa qué ganda tiidi' ca guendanagana stilu' la? gunna dxichi nanna Jobá guirá' ni cadí'dilu' ne ma' bicaadiágabe ca oración stilu' (Isaías 30:19; 2 Corintios 1:3, 4). Sicarí' bicaa Pablu: «Peru jneza runi Dios, ne qué zudii lugar guee-da xiixa luguia' tu ni qué zanda gua tu, sínuque laga zacané laatu tidi tu ni ora idxiña tu ni, ti ganda gua tu ni» (1 Corintios 10:13; Filipenses 4:6, 7).

w18.01 yaza 9 párr. 8, 9

«Rudiibe poder tuuxa ni ma' bidxaga»

⁸ (Biinda' Isaías 40:30). Neca randa rúninu stale cosa, cadí guirá' ni zanda gúninu né stipa si stinu. Ne nga nga ni cadí naquiiñe' guiaanda' laanu. Guini' íquenu ejemplu sti' Pablo. Neca gúcabe ti hombre ni gunna stale cosa, qué ñanda ñúnibe guirá' ni racalá'dxibe. Ora gúdxibe Dios caní naguu xizaa laabe, laa bicabi laabe: «Purti jma rihuinni enda nandxó' stinne ora cayaadxa stipa líi». Biene Pablo ni gúdxibe laa que ne guni' ora riaadxa' stipa laa jmaru' si nadipa' raca (2 Cor. 12:7-10). ¿Xidé ngue caní' Pablo ya'?

⁹ Biene Pablo qué zanda guni stale cosa pa qué gacané stobi jma nadipa' laa. Espíritu santu sti' Dios zanda gudii stipa laabe ora ma' nuube débil. Ne cadí ngasi. Laaca zanda gacané ni laabe para gúnibe cosa ni qué ñuu dxi ñúnibe stúbisibe. Ngaca nga rizaaca né laanu. Rihuinni dxíchica pur poder sti' Dios zanda gápanu stipa.

Guyúbinu ca perla ni ga'chi'

w18.12 yaza 8 párr. 10-12

Ni rinabadiidxa' caní ruunda'

«Guionna guibá'» ni riete lu 2 Corintios 12:2 zándaca laani nga Reinu mesianicu ra chigu-

ni mandar Jesucristu ne ca 144,000, o «ibá' cubi» (2 Ped. 3:13).

Runibiá'cabe ni casi «guionna guibá'» purti' Reinu ca nga gobiernu jma risaca.

Zándaca «paraísu» ra guyé apóstol Pablo lu visión que nga 1) Paraísu ni chichuu ndaani' Guidxilayú 2) paraísu espiritual ni chichuu ne zaca ni jma naro'ba' que ni nuu yanna, ne 3) «paraísu sti' Dios» ni nuu guibá'; guirá' cani bizé'tenu ri' ziuu caniuntu dxi gaca Guidxilayú ri' ti paraísu.

it-1-S yaza 317

Bixidu'

«**Bixidu' santo**». Escrituras Griegas ruzeete' de «bixidu' santo» (Ro 16:16, *TNM*; 1Co 16:20; 2Co 13:12; 1Te 5:26) o «bixidu' de amor» (1Pe 5:14, *TNM*). Zándaca né ti bixidu' nga bigapadiuxi binni dxiqué, gunaa né gunaa, hombre né hombre. Zándaca yenanda ca primé xpinni Cristu costumbre gupa ca hebreu bibani dxiqué de ugapadiúxica' binni né ti bixidu'. Neca qué rudii Biblia detalle de laani, peru rihuinni dxichi «bixidu' santu» o «bixidu' de amor» ca bisihuinni ni guyuu ca hermanu ni nuu ndaani' ca congregación que tobi si ne nabé guyuu guendarannaxhii ládeca' (Jn 13:34, 35).

27 DE MAYO HASTA 2 DE JUNIO

CA TESORO ZEEDA LU BIBLIA | GÁLATAS 1-3

«Udinde nia laa»

w17.04 yaza 27 párr. 16

¿Ñee ridú'yanu ni jneza casi ruuya' Jiobá ni la?

¹⁶ (**Biinda' Gálatas 2:11-14**). Bidxibi Pedro purti' qué ganna xi guiní' íquecabe de laa (Proverbios 29:25). Laabe nánnabe xi riní' ique Jiobá de ca binni ni naca gentil. Neca zaqué, bidxibi Pedro niní' ique ca xpinni Cristu de Jerusalén, ni yeganna lugar que, mal de laa.

Bidxibi Pedro niní' íquecabe mal de laa purti' ridxaaga ca xpinni Cristu ni naca gentil. Gu-dxi apóstol Pablo Pedro cayuni laa hipócrita. ¿Xiñee gúdxibe laa zaqué ya'? Purti' binadiaga Pablo laabe dxi bi'ni' defenderbe ca gentil lu reunión ni guca Jerusalén lu iza 49 (Hechos 15:12; Gálatas 2:13). ¿Xi zuni sentir ca xpinni Cristu ni naca gentil ni bininá Pedro que ya'? ¿Ñee zudiicabe lugar gusaba ndi' laacabe la? ¿Ñee ziaaxha Pedro ca privilegiu sti' pur bichee la?

w13 15/3 yaza 5 párr. 12

Gasti' qué zanda gusaba ca binni ni nadxii Jiobá

¹² Nabé bidxibi Pedru binni purti' guní' ique zándaca gúnicabe laa xiixa, ne neca bicheebe chupa chonna biaje, qué nixélebe de Jesús ne de Jiobá. Guietenaládxinu dxi guni'be qué runibia'be Maestru stibe nezalú stale binni ne bi'nibe ni chonna biaje (Luc. 22:54-62). Ra gudí'di' dxi laaca bi'nibe sti cosa ni cadi jneza: gucaládxibe nusihuinnibe huaxié' risaca ca xpinni Cristu de sti guidxi que ca judíu ni ma' naca xpinni Cristu. Peru nanna Pablu cadi jneza guiní' ique ca xpinni Cristu nuu tu jma risaca lade ca binni ridagulisaa. Racá ridú'yanu cadi jneza ni bi'ni' Pedru. Ngue runi, ante guni xcaadxi xpinni Cristu zaqueca la? gudxi Pablu laabe cadi jneza ni cayúnibe (Gál. 2:11-14). Ñee bidxiichi Pedru pur ni gudxi Pablu laa ne pur ngue nusaana carrera ra zanda guicaa guendabani la? Co', sínuque guní' íquebe lu conseju bidii Pablu laabe, bizuubabe diidxa' ne biaana-be lu carrera stibe.

Guyúbinu ca perla ni ga'chi'

w14 15/9 yaza 16 párr. 20, 21

Bi'ni' ni na Dios neca tiidilu' «stale ra nagana»

²⁰ Yanna, xi zanda guininu de ora rucaalú Bini-dxaba' laanu sin gudí'nu cuenta ya'. Xi zanda gúninu ora care'nu gana ya'. Tobi de ca cosa ni jma zanda gacané laanu nga guiní' íque-nu lu guendaguti sti' Cristu. Ne ngape' nga ni

bi'ni' Pablu. Guyuu biaje bi'ni' sentirbe qué risá-cabe pur nácabe binni ruchee, peru gúnnabe qué ñati Jesús pur binni ni qué gapa donda, sínuque guti pur ca binni ruchee casi laabe. Ngue runi bicaabe: «Rune cre Xiiñi Dios ni na-dxii naa ne bidii xpida *pur naa*» (Gál. 2:20). Gunna Pablu guti Cristu pur laa ne bidii cuen-ta zanda gulá guendaguti que laa.

²¹ Pa gú'yanu guendaguti sti' Jesús casi ti cosa ni bisiga'de' Jibá *cada tobi* de laanu la? zan-da gacané ni laanu. Peru qué rini' dí' nga nagueendaca ziu'nu gana. Nu de laanu zán-daca gudxí'lunu guendanagana ri' dede dxi gueeda guidxilayú cubi ca. Peru ¡cadi guireelu' gana! Bietenala'dxi', caní guni huantar nga caní zacaa premiu ri'. Ze' dxi jma gaxha para guni mandar Reinu sti' Dios ne guedané guenda-riuudxí ne zacané ni guirá' binni nacha'hui' gácaca' binni sin donda. Gudixhe ique chu'lu' lu guidxilayú cubi ra guni mandar Reinu sti' Dios neca yanna ri' gápalu' stale guendanagana.

it-1-S yaza 984

Carta para ca gálatas

Ora guní Pablu: «¡Aque nahuátitu xa binni de Galacia ca'!», cadi caní'be de ti grupu de binni de raza galo ni nabeza ladu guiá' de Galacia (Gál 3:1, *TNM*), sínuque caguu jnézabe caa-dxi binni ni nuu ndaani' ca congregación sti' Galacia purti' cudiica' lugar guicá xpia' caadxi judaizante ni nuu ládeca' laaca'. Ca judaizante que nga caadxi judíu ni racala'dxi' gusihiinni cayuni ni jneza ra zinanda Ley ni gucuua Moisés, lugar de ñúnica' ni jneza ra ninándaca' pactu cubi que pur fe stica' (2:15–3:14; 4:9, 10). Ndaani' ca congregación de Galacia (1:2) ni bicaa Pablo carta ra nuu que, nuu binni judíu ne ni cadi judíu. Cani cadi judíu ri', ná-cacabe prosélito ni ma' guca circuncidar ne nuu ca gentil ni ca'ru' gaca circuncidar, nuu de laaca' zándaca zaca' de ca celta (Hch 13: 14, 43; 16:1; Gál 5:2). Ca xpinni Cristu ri' gú-dxicabe laaca' gálatas, purti' gulézaca' Galacia.

Modo bicaa Pablo carta ri', rucaani laanu gui-ní' íquenu bicaabe ra nuu ca xpinni Cristu ni nabeza' ladu guete' de Galacia, provincia sti' Roma, purti' nabé runibia'be laaca', ne cadi ra nuu dí' ca binni ni nabeza ladu guiá' que nga bicaa Pablo, purti' qué ñunibia'be laaca' ne zán-daca qué lica nigánnabe laaca'.

